

秋蟬吟館詩鈔

秋蟪吟館詩鈔卷二

上元金和臣匏

椒雨集上

癸丑二月賊陷金陵劍浙矛炊詭名竊息  
中夏壬子度不可留拚面辭家僅以身免  
賊中辛苦頓首軍門人微言輕窮而走北  
桑根舊戚恩重踰山自秋徂春寄景七月  
而先慈之訃至矣計此一年之中淚難頽  
愧聲不副愁幾昧之無遑言競病惟以彭  
尸抱憤輒復伊吾亦如麴生之交尚未謝

絕昔楊誠齋於酒獨愛椒花雨椒辛物也  
余宜飲之又余成此詩半在椒陵聽雨時  
今寫自癸丑二月至甲寅二月詩凡百五  
十餘首爲椒雨集

原盜一百六十七韻

先皇壬寅年外夷肆鬼嘯既奪潤州隘遂鼓金  
陵櫂先夷未至時南民畏其暴紛紛謀避城婦  
人尤遠蹈俄而官盟夷江上敵削約虛驚七旬  
餘夷去疾若鷁城中高舉者村居半改貌宵眠  
蟲無幬晝食羹不芼至是驅車歸戚里相迎勞

捶胸論酸辛把酒不能酬風日蘊蓄深致疾每  
難療朝朝歌蒿里處處焚楮鈔由來十餘年談  
次神尚懊今茲粵氛惡詎不烽早耀大家鑒前  
車主靜信神告

先賊未至時南中之間於神者  
尊卜鸞請皆云靜吉豈無神邪

抑真數之婦口雖嘵嘵男兒必執拘萬人無一  
不可違邪

二網免脫身越餘皆陷盜中將肉委虎豹往往  
婦語男以不見幾誚我雖與衆殊交謫略同調  
豈知中夷毒匪獨民不弔國事此荆莽禍固  
有由造夷乎詿誤多聽我說原盜盜首生潯江  
實在交廣徼湘南諸煤戶寒等厥民隩蠢蠢初

無知羣聚第叫噪縱或觸犴獄不過氣桀驚極  
其才所能相率事掠剽平生委泉壤夢不及官  
誥何至夜郎大乃欲竊名號當夷搆費日此盜  
各年少方於災荒居近見夷犯澳只覺孫盧鋒  
大都炬火爍中原有全力海必澆熠燿旋聞閩  
越靡江南順風到前後才三年萬里騰狂趨  
帝自赫然怒諸將太不肖專閫獵海琛上上珠  
翠帽自其黷貨外則一無所好嚴衛色常墨魂  
隨鼓輦搖那知戰何事如女羞說醺彼夷視諸  
將餽問合屎尿據楯可罵之不肖詛楚禱若以

忍辱論孺子竟可教代夷張虛聲給 帝太阿  
倒待寇作上賓禮直修聘頗賂以金如山市假  
神州壤奏書單于悖奚止佗兀冪居然呼二天  
含笑魑面類歸舟吹競律喜氣徧壺嶠此盜斯  
生心本來昧忠孝遂謂狂蟆精果食太陽曜時  
於輟耕餘隴上野性趨指天而畫地側身忘載  
燾從此堡社閒殺人向人訐椎埋漸公行罔忌  
刑禁競萌芽特猶微虺敢蛇遽效向使盟夷後  
諸將略計較病過從良醫戎事急學數因其人  
震悚選其俗悍剽月異歲不同使知武可樂壯

健皆 國有善養鷹與鮑邊隅固金湯春秋重  
 邏哨懲羹夫何嫌備豫古訓要此盜必不起起  
 亦可立標何知封疆臣舊習是則倣 祖宗定  
 兵額歲折幾路漕久皆成具文談兵徒柄鑿手  
 握龍虎符於心似無忤權陰屬偏裨千夫百夫  
 燾一家妻若子首易姓名冒更用訓私恩姻特  
 芘蘿薦十已吞二三然後兵列竈兵復互容隱  
 濫竽廁幼耄大率州郡兵實數太半靠借問兵  
 何爲分飛鳥與鷁中有至賢者恂恂士游校市  
 井別肄業治生及屠釣劣者殊不然鄉閭恣蹂

蹕溺影兼吠聲勢憑城社突彼所謂長官聞見  
久聾眊平日奴隸叱門戶供灑掃賤役靡不執  
次第直分倖貓俱狎鼠眠家人比嘻嘻抑有少  
忤意威欲杖以藿乞憐地暫搶逃罪柱還繞亦  
可祖父前子孫大謹噉反師顏子淵犯者置不  
校大吏以時點樹旗帳曰操逐隊仍兒戲壁上  
聚觀譟瘠馬雕錦鞍廢劍髮黍鞘冠必朱影纓  
韉必綠長勒鎗或火不鳴矢或風而趨約略步  
武齊鼓絕銀字犒偶擗毫毛疵責之煩扑敲是  
爲司馬政兵精一歲報其在兵婚喪且別賜芻



稍令節亦優。補軍籍抵金窖浩浩。天子恩車  
甲雨時膏。褻威顧若此甚矣。國財耗此盜以夷  
卜如獲上吉。玦更知營壘情私。慶舞其翮腥。燄  
彌吹揚已將發之慄。又況守若令棠愛匙。頌邵  
萑苻藏巨姦。明鏡都失照。有民縛盜來。駭甚雖  
在。抱誦誦爲盜辯。拍案老鼃叫畏事。甘養癰屢  
放。鯁出累其民堂下。譁唾面自拭。炮民皆太息  
歸。盜愈睨之傲。拱手仰盜息。若勝憂旱。勞盜曰  
粟粟之不敢貴。昂糶盜曰衣衣之不敢吝。宿漂  
同聲怨官。懦萬口籥應。飭官聞乃大樂風雨忽

森瀑桎梏拘而來謂汝盜援奧否胡餉盜爲汝  
身象自燒黶黶盆蓋冤逢逢瓠鑽竅明明樓幻  
蜃隆隆鼎賄郤勿問淚眼枯魚肉猛咀噍坐此  
民怒深家駒化作獬垂時盜潛扇教畜短髮耗  
黃巾與紅巾胥界大布帽鵲唬惑鳩媒一旦傾  
巢策東家挾其楹西家撤其楣南家負其鋤北  
家挈其鉞此焉捐囊簾彼焉獻困窮決計踵盜  
門願與盜分俵請爲盜前驅轉似漆投膠由是  
盜驟熾狐語燈夜罩擘雷喧角鉦愁雲布旌旄  
卻從夷主名耶穌拜初廟逆視夷有加誣天妄

稱詔試窮此盜根然否盟夷召至于兵興來諸將則尤妙本來勁旅稀市人雜嬉敷苟能漸摩厲擇繫汰其糙勇可作而致何懼不輕僇乃從肉受脰即如麪飲醇纔聞壇上拜便睡山中覺只期幕烏集瞋舞晨雞踞自盜弄潢池於今幾寒燠所過皆嚴關守可一夫燒步步讓畔耕省盜馬箠擊諸將隨後塵聊當遠臨眺畏盜膽易破未戰師已燒將是蟬語冰兵是蠓旋淖在我秦室憂久知原必燎獨至金陵失真非意所料謂有向將軍夙名騎之驃 帝望屬方新功詎

他人媚固當計倚角預阻長江艤盜既來如飛  
赴援進必躁豈不念南民延頸積腧眊但使牽  
其外環城富有礮雖圍庶無虞城幸最險隋故  
抱不遷議敝廬守宵篠吾母疾久病體弗任輿  
輶自宜安鳩安未用鬧蠶鬧安知吾智昏終詒  
家室悼誰云狃於夷佳麗地戀嫪昨者夷船來  
士女粟亂爆猥曰夷同仇將藉鯨逐鰓其實牟  
利行交反通紘編鑄姦本同物往事早先導倘  
命回紇助多恐頭不掉非夷此盜無無爲盜所  
笑

言二  
三月二十八日作

自從中春來悄悄閉門戶出入必以夜粥飯亦  
夜煮街上聞人行搖手戒勿語作計叢棘端地  
獄無此苦誰知復大索謂有男近女按籍編女  
口賊婦作官府楚婦猶人情粵婦毒於虎明知  
是家人問訊或不許過者稍遷延拔刀勃然怒  
痛哭形問影影似唾罵汝汝母遂無兒汝子遂  
無父汝妻遂無夫汝婢遂無主汝死亦無名汝  
生亦何補

周還之

葆淳

作無題詩二十四首假以書

憤同人多和之者余亦得四首

春陰黯黯閉門居禁火時光破膽餘敢爲明珠  
多護惜乍聞曉鳥亦生疏癡心尚想花無恙薄  
命應知水不如背後相逢剛一笑大家雛髮上  
頭初

曉風鈴索暗心驚金屋深深住不成出海瞋魚  
從急性對人羞草只吞聲願埋黃土都難事得  
傍紅燈是更生如玉阿侯拋擲苦胭脂山虎果  
無情

村婢如今舊誓違琵琶別抱不嫌非甘隨龙吠

言二  
燒香去忍逐鵑啼響屨歸同伴難禁尖口角新  
妝頻逞瘦腰圍紅綃未是真承寵要著葵黃入  
道衣

朱樓落盡萬花枝洗面朝朝眼淚宜山欲望夫  
和土化鳥休思婦覓巢癡竟沈苦海終非計便  
出愁城已不支學得南朝無賴法破家時節苦  
裁詩用王次  
回句

有諷三首

錦衣玉貌好兒郎手握長刀冷似霜幾日公然  
鴟語孰他年真恐賊難當

媚賊將無作計疏徒令華屋變榛墟自家門戶  
今何在莫逐錐刀拾唾餘

自是傭書勝荷戈通人筆墨不煩多美新二字  
須珍重箭在弦時試一磨

五月七日母命出城述賦

老母傳示紙三寸欹側澹墨十數言謂聞爾日  
賊促戰千家萬家人出門爾獨何爲戀虎口六  
世名族惟爾存生是婦人當死耳此時言義休  
言恩爾去將情告諸帥況爾有口兵能論背人  
讀罷火其紙纔欲痛哭聲先吞中夜起坐不能



寐十指盡禿餘齟痕在家何曾得見母母教誠  
是兒智昏宿將南來過兩月胡至今日軍猶屯  
或者條侯太持重不識此賊原遊魂倘以裏言  
走相告未必幕府如帝閭藉手庶幾萬分一還  
我甘旨雞與豚甘作罪人背母去甘金饋賊吾  
其奔時逃人必先輸賊中貪者金其賊即備以出城始免賊詰

初九日出城既至善橋作

出城二十里世界頓清涼不覺髮將白纔知日  
尚黃居人盡旗鼓吾輩又冠裳重見 聖明詔  
羞揮淚數行

自秣陵關買舟冒雨至七橋甕馬總戎龍

營求見

早潮人說船行易五十里路夕未至夜深雷雨  
破空來疑是城頭戰方利小船漏水時欲沈袴  
襪無乾不能睡燒燭聊談紙上兵到曉剛成六  
千字遙遙乍見當頭旗船得順風槳生翅須臾  
繫纜營東頭萬帳星羅眞得地此時雨猛更逐  
人草滑泥深策無騎束縛芒屨側足行軍前豈  
可輕兒戲漸聞朝令許傳呼長揖扣門敬投刺  
將軍竟作階下迎纔見逃人先迸淚敢謂此賊

不難平三月遷延自攻愧張髯怒罵驕兒兵如  
所云云頗非醉坐來徐獻袖中書五策居然中  
三四欲推欲挽忽沈吟前席無聲似酸鼻但言  
大帥在鍾山到彼雄心儻一試我聞未免中狐  
疑於我何嫌若引避歸船聽取道旁語請戰都  
非大帥意將軍近已病填膺不是將軍不了事

自十六日至十九日歷謁 欽差大臣向

崇撫部許乃劍提督和春諸營退而感

### 賦四首

到此烽塵路八千諸君莫更似從前徵兵十道

頻增竈追賊三年等執鞭若使蠡屯江盡地須  
防梟薄日邊天巧遲拙速關全局不但南民  
望眼穿

休說黔驢技有餘夥頤沈沈

去讀

易殲除大都死

盜逃疏網誰見祆神載後車勇爵儘排槐國陣  
智囊無過稗官書兒嬉優劇殊堪笑豈可非夫  
賊不如

只今百日駐江濱未到量沙豈慮貧人命可堪  
金注重軍聲惟仗火攻頻腹真不負恆遺矢膽  
若能飛早去身上將從來心謹慎自知原比主

知真

此行奪命出圍城敢謂書生解用兵只覺戴天  
難忍痛況知攪海盡虛聲解懸但願家全活借  
箸休疑事近名舌敝脣焦無是處酒悲贏得淚  
縱橫

述痛

有鄰叟自城中出致母命專意軍事無  
以城中爲念

初心若是此行虛我罪深還勝絕裾忍淚替添  
衣上綫請兵爲獻馬前書四年長病惟敲枕五

夜無眠當倚閨桑甚鍋焦誰寄與累人甘旨近何如

孝陵衛寓樓飲酒十首

是日於許營晤林編修汝舟亦奉命

領軍者自第二首至九首皆述是日間答語也

巷外悲笳不可聞傳杯只合對斜曛便教爛醉今宵死也比蟲沙醒幾分

拖泥帶水外重城爲報紅夷礮可傾豈是一人偷憾事崇墉難道紙黏成

嚴關已奪尚何愁縱有縣門可發不幾見百川歸海處能憑一舸斷東流

畫灰纔罷帛書通誰遣黃巾侍帳中縱說愚民  
甘媚賊可能推問道旁風

千帆萬楫繞江灘纔計焚舟便不歡自是留他  
歸路意可知此次讓城難

卻瞋餘燼半偷生底不呼刀徧四城也識殺人  
容易事未應民膽大於兵

指示雲梯十丈高每當支處吠嗷嗷棄人若是  
真憑大壯士何妨試奏刀

藥籠窮摻詛祝材賊身苦說是蛇胎肘縣金印  
大如斗悔不當時使鶴來

賊金如土積無邊班處都堪多得錢此事也須  
憑一鼓封侯豈但畫凌煙  
醉餘無俚事歌呼回首慈親望眼枯怪底賊能  
操勝算道渠來日亦如無

痛定篇十三日

兩日善橋飯三日龍溪眠一日服要村五日鍾  
山巔栩栩隨風蝶跼跼墮瘴鴛昨日賃此屋乃  
在營東偏危樓十數椽一月錢二千庖湊借鄰  
廡几榻聊安便薄醉從飽睡笳鼓時喧闐中夜  
復起舞敢謂聞雞賢竈熱還因人已起晨炊煙



居然鳥巢林風雨可避焉如今痛定矣請歌痛  
定篇

正月二十七居人走相報謂有奔馬來江警今  
在告負郭千萬家入城附堂奧如牛得火驚似  
蟹在鐺躁明夜城外喧次第賊果到九城先已  
閉守陴各安竈我亦登城看始見賊花帽是時  
賊尚稀城下肆舞蹈轟然鳥機發卻作厲鬼倒  
晦日朔日閒環城樹大纛紅衣而黃裳遂集如  
毛盜城中眇勁旅沉賊攻之暴乃招市兒兵徒  
手助鼓譟從此盼外援北望費祈禱天皆低欲

顏十日雲不掃惟餘礮火明萬鳥避而噪夜夜  
城中民煮粥上城犒

二月初九夜礮急不容瞬遲明繞城呼賊自北  
城進北城地臨江隧道賊暗濬城根失憑依一  
角礮自震砉然若低隕險步賊乃趁是時守城  
者尚欲覺其覺囊米積如薪畚土實諸櫬所崩  
恃補苴功頗奏之迅入城賊數百大半亦飲刃  
誰知他城兵得賊入城信一唱百和逃奪命自  
蹂躪西曰清涼門蕪蔓略不潤近南有矮城其  
差將及仞萬賊攻方環忽見解嚴陣遂以雲梯

登諸山斗合燼督師來自東菴戰以身殉其餘  
數十官先後死其印狼虎從無休街市漸充物  
刀鎗極天鳴走避駭覲齟吾鄰屋太華必受賊  
問訊奉母急移居蓬茅各牽引閉戶不敢眠夜  
聽鼓角振

夜聽鼓角振借問在何所八旗駐防兵只今稱  
勁旅防者防此邦本藉固江圉地重兵恐單所  
貴侮同禦滿漢久一家在國皆心膂帝惟  
無分民守土故用汝聖澤二百年斯民和飲  
醕何期邠岐人終欲外齊楚當賊初來時意已

略齟齬四城籌守陴僅以什五與謂此外城事  
自居謀越俎及聞北城摧第一氣消沮西南棄  
城走孰先曳戈杵猥云保內城內城大幾許如  
樹之有巢如水之有渚水潰樹既顛巢渚豈可  
處縱令獨瓦全孤寄等雀鼠碎壁執其組於

國詎有補况萬無此理譬蟹早失馭徒令賊致  
力面面合鋒炬戶萬口五萬裹創及婦女豈不  
奮臂呼各以死戰拒一隅果難支賊如毛羽舉  
試聽今夜聲痛哭徧郊野何不昨者晨仍結外  
城侶固知寇已深南人劫方巨要之秦越視吾

終疑其語

賊既全入城我門更深閉不知門中人今所處  
何世遑問他人家朝夕底作計中夜猛有聲火  
光極天際俄頃數十處處處借風勢屋瓦一時  
紅四方赤燦帝心揣賊所爲殘命萬難貰母呼  
坐近牀兒女各牽袂阿嫂將一繩繫婢還自繫  
謂死亦同歸神定都不涕門外賊鳴鉦鳥語音  
方厲驅人往救火不許道旁憩相顧愈狐疑將  
無賊夢囈忽聞叩門來乃是西鄰婿一一爲我  
言始知火根柢日來賊科財按戶如責稅賊黨

復私掠先據最高第囊篋罄所有襦及婦衣敝  
錢盡更捉人隨意犬羊曳苟有稍忤者一刀以  
爲例故爾素封家或則縉紳裔與其遭僇辱束  
手以貨斃不如早焚身自甘灰盡瘞其餘鳩縊  
溺往往毅魄逝裏尸匙柳棺葬者血盈皆汝居  
幸獨陋賊過不屑睨

初十至十九略定殺人性打門喧相傳賊亦有  
賊令令人占口籍書年與名姓老弱可從略意  
在壯者勁大半署爲兵加僞號曰聖其舊操何  
業及時許更正苟所甚需者則亦隊伍併惟男

與婦分不得室家慶賊婦實掌之違者致禍橫  
我姑避其鋒獸肯自投穿江東大如海差異叢  
爾鄭往從數親知南北腳力競黃昏不敢歸直  
待月懸鏡平明又出門東食西眠竟有時驟遇  
賊所賴日適病單福與張祿隨意我爲政亦嘗  
受賊拘尺寸手無柄賂之復得免始信錢勝命  
置身如此危幸不爲賊訶

二月二十三傳聞大兵至賊魁似皇皇日或警  
三四南民私相慶始有再生意桓桓向將軍仰  
若天神貴一聞賊吹角即候將軍騎香欲將軍

迎酒欲將軍饋食念將軍食睡說將軍睡老母  
命近前推枕手彈淚謂有將軍來死亦甘下地  
縱遭玉石焚猶勝虎狼寄七歲兒何知門外偶  
嬉戲公然對路人說出將軍字阿姊面死灰撻  
之大怒詈從此望將軍十日九憔悴更有健者  
徒夜半誓忠義願遙應將軍畫策萬全利分隸  
賊麾下使賊不猜忌尋常行坐處短刃縛在臂  
但期兵入城各各猝舉燧得見將軍面命即將  
軍賜誰料將軍忙未及理此事

金陵百萬戶平居如儉荒豈知崑崙山中有萬



寶藏賊能竭澤漁毒網彌天張朝令徙一巷暮  
令遷一坊次第驅其人以隊叱犬羊其人既已  
驅返身上其堂井竈庖廚楹屏柱牆一一  
捐之爛惟恐屋不傷盆盎鼎豆壺几匱厨施牀  
一一撞之碎惟恐物不戕然後謀飽橐首選白  
與黃有錢或萬貫有珠或一囊有薪或千車有  
米或百倉珊瑚翡翠玉海中之奇香灼灼目不  
識棄在塵土旁羅綺錦繡段紅閨舞衣裳鐵體  
衣十重山鬼跳太陽闐然鳥獸散頃刻荆棘場  
吾固謂此賊不稱星天狼實破敗五鬼天使來

披猖居人夜潛歸無聲淚浪浪

我家何所有家具慙中人從賊泥沙之豈值錢  
千緡獨有書八廚自謂家不貧我父客四方前  
後五十春歸必載數篋用壯車前塵我兄嗜彌  
篤廿載朱門賓少小不好弄惟書道津津生平  
所肆力目錄學者醇故能擇英華片紙賞必真  
我承父兄教差亦解苦辛洛市十餘年所聚略  
等身兩世三人勞羅致傳家珍讀之方未盡每  
愧紅蟬鱗以視百城擁誠如附庸臣井蛙而遼  
豕未足跨龜麟要資儉腹糧聊當粟一困況有

希世物呵護宜鬼神此皆筆耕得善價分米薪  
非果有不廉詎令天生瞋胡亦爲賊據屋悔西  
南鄰聞我尊閣地萬難今司晨可想油素積賊  
見怒且顰大半供爨燭劫火同暴秦否亦污穢  
旁布囊紛前陳天平無乃惡我淚常霑巾惻惻  
念吾寶寶甚金與銀慘哉芸根香終古不復新  
賊婦作何狀略似賊裝束當腰橫長刀窄袖短  
衣服騎馬能怒馳黃巾赤其足自從入城後忽  
效吳楚俗夜叉逞華妝但解色紅綠彼或狐而  
貂此或紗而縠鬼蝶隨風翻豈問春寒燠頭上

何所有亦戴花與木臂上何所有亦纏金與玉  
錦綉不蔽踝但禁裾六幅更結男子襪青鞵走  
相屬鵠舌紛笑譁磨集踞高屋朝去朝賊王官  
以女頭目既定兄弟籍乃盡姊妹族女皆曰姊妹不以老幼異稱大索從閨房一見氣敢觸慘慘  
眉尖蛾撞撞心頭鹿小膽皆鼠銷修頸半蠶縮  
吞聲出門行敢云路非熟十里更五里尚謂行  
不速喃喃怒罵多稍重且鞭扑襪被未及攜知  
在何處宿求死無死所求生則此辱苦恨小兒  
女徒亂人意哭棄置大道旁不復計慘毒長者

乞食呼幼者蠅蛄族我急還家看幸未被驅逐  
三月二十八有賊叩門急我先出門外去賊十  
步立其旁一人者善氣似可挹稍稍前問訊家  
乃楚夏邑城中販麥來被賊苦拘執千里驅相  
隨笄鶴雙翼戢謂我啓厥戶毋貪蟄蟲蟄邇日  
括婦口一一豚入茲今已至此方豈免駒盡繫  
有婦性和柔賊畀爵一級此方所經營意在澤  
雁輯汝宜速作計戚里廣招集故廬仍可居庶  
幾便樵汲況汝有病人衾榻亦所習當斷若不  
斷黯黯閉門泣坐待賊搜掠臍噬悔無及彼賊

皆蝮虺枯苑在呼吸我聞感其言不覺欲長揖  
往告鄰家婦附處約三十當關施闌幕藩籬略  
修葺妻兒踰閭語聲尚通嗚嗚老母室內眠我  
遂不得入我有然諾友業織錦重襲其家賊所  
留逋客陌而什且往從之謀盟似責車笠脫身  
寄朱家觴豆都仰給朝去市饘粉貴抵羊乳汁  
雞子與菰苳聊當紫葢拾踵門遙遺母餐飯冀  
加粒歸眠複壁中夢醒被池溼

將軍遲不發賊愈得意鳴一軍將北旗一軍將  
西旌居然據蝸角不突思長征前所得健士逃

歸半空營城中更選人萬千立取盈凡在工商  
賈按冊尋其名初猶作狡獪各以羸老更賊見  
皆唾棄唾棄爲不精擾擾十數日賊亦知此情  
乃爲拚羣計中夜雷交轟簿錄卧榻側牽去如  
春醒或則假他役賺之出嚴城授棘江上岸載  
以空舟輕甚且要諸路隨處施長纓纍纍猿千  
頭歸紡庭前楹監守網愈密語即蛙目瞪有亡  
則荒閱同室巢俱傾偏伍既略備命爲前驅兵  
其後楚北虜其後楚南黥最後數粵賊高騎司  
鼓鉦日必窮足力次第相告偵苟有反顧者速

殺尸前橫飲泣操戈矛安知幾許程猶幸所至  
潰賊自馳先聲偶遇王師怒萬死無一生捷  
書則曰賊某日先登爭臣等獲大勝此戰敵克  
勅可憐蒼與赤遂作鯢而鯨九泉哭呼天豈復  
達聖明我雖棲喬柯一日常數驚身無蟬翳  
葉終恐受醢烹老母聞其故手書斯勸行

我行既已成如雞曉出甕區區殺賊心尚未解  
醉夢自謂賊中來賊情億頗中懷刺千軍門聊  
以所見貢要之爲鄉里泣血大邦控我言賊可  
攻不信試詢衆雖在五尺童亦知非鑿空何期



賊命長我力難斷送徒以全家陷此計仍拙弄  
長歌痛定篇能定阿誰痛

過龍溪見製小戰船知將由後湖緣臺城  
者也漫書十二韻

百手丁丁斧剗舟七尺輕傳聞習流隊作計戴  
星征將渡汜南水因登莒舊城裏氈窺閭道持  
練集新兵柰擊池鵝亂誰鞭天馬行不冰橋豈  
合有樹塹難平一葉浮中夜千金當木罌飛來  
同巨筏越頸定長纓此地賊無備其功今可成  
如何當大道已自播先聲洛恐囊沙壅淮防瓠

火明寄言籌筆者甚矣子之情

北去之賊自江浦過滁州出臨淮渡河陷  
歸德圍汴二首

此賊江南去當時誰守江生平向公子國士欲  
無雙列帳關蹲虎先鞭夜避虜只今歸不得未  
戰莫疑降

竟出中原路由來古戰場豈知千里遠更少一  
軍當無限杞人意憂非在洛陽去天今尺五步  
步要金湯

追紀五月初十日事贈同學張君荷生

面目焦黑汝何人泣數行下爲我言四月之初  
脫羅網自念殘命甘從軍獻書首言募兵事爲  
有城內諸逃民誰無父母與妻子欲救奚翅溺  
與焚仇讎未刃苦無計及鋒而用斯銜恩民愚  
豈不自量力舍生萬一能生存此議初上未許  
可同病人已先知聞螳勇螳義願效死四千餘  
衆何紛紛一錢粒米不受賞但憑歃血盟言真  
五月初九奉嚴令按圖索馬當明晨明晨官軍  
大破賊急須此輩從風雲是日四千人者至各  
囊大餅懷在身短衣特書復仇字刀光戛戛秋

水新折枯湯雪期一舉拔山凌波豈等論官軍  
或言戰危事怒髮上指眉不顰此時有進已無  
退萬足蹙上天邊塵行行去城未五里賊纔望  
見齊反奔隼飛獠進逐之猛呼聲直徹高城垣  
城垣巨礮暗不發重門洞啓無人門全城已是  
掌中物只欠合戰殲殘魂官軍步步常在後到  
此忽作中田屯大旗舞動金奏急道有地火埋  
機輪城中了無立脚地如雷震起都千鈞固知  
賊不解爲此曾何所見皆云云嗟乎民本非賊  
敵大力恃有官軍援儻能孤行自殺賊在城豈

惜清妖氛今者官軍既告絕近城復退悲風吞  
從此心寒氣亦短勢難復聚饑腸貧君謂此事  
可怒否哽胸熱淚冤誰論我今告汝冤休論將  
軍螫汝方汝瞋幾欲殺汝訓汝勲儻其殺汝訓  
汝勲汝今已作無聲燐

六月初二日紀事一百韻

將軍刻日封鯨鯢大睡忽得人提撕更不深守  
處女閨初時頗聞兵怨詆謂我一戰身則斃重  
賞安見信有覲且糜日餉河滿鷗誰以性命爲  
稗穉儻欲狂寇庭全犁除非有牽乳自羝將軍

畏兵虎畏猊衝冠一怒恐噬臍驕兒愛子言笑  
睽阿嬭敢勿謀饔飴先期大饗聊止唬軍帖火  
急一卷批牛羊豬魚鵝鴨雞茹瓠蔥韭菰菹藜  
桃杏櫨芍蕒蕒梨酒鹽粉餌油醬醢五日購物  
車接騫六月乙亥明猶黎將軍夙起列羽蜺命  
所親卒馳馱傳箭代速千營齊繞營三里借  
竈雉釜甑不足襍瓠瓠庖人累及民家妻咄嗟  
而辨髮未篋百錢顧勾奴充奚流汗被面洗面  
驚卓午大宴山之蹊銀刀雕題相招攜斯扈濫  
進齒恃齟若罔若思屨鞢觴狙援雀躍紛推擠

布地作席瓜分畦穹廬洞徹渠荅剝渴鼈一呬  
酒一婢餓狼一咽豚一蹠如坻立刻如淮漸須  
臾腹飽酣顏霽抹額緩縛衣妥視腦後各杙螺  
髻笄螳臂半露文身鰲僊僊胡舞學白題孰爲  
巴瀘孰羯氏歌聲不辨鴟與鸚淫哇襍述下蔡  
迷公然趙女行媿媿花帽利屣長袖袿箏琶勸  
醉柔玉蕙最後將軍曳文綈循行親執雙偏提  
酌其隊長評曰緊諸軍勞苦鄉夢睽賊不足畏  
胡吹齋幸爲我盡剝兕犀孽種罔赦卵與麝書  
功上上行析圭賅賚聽汝塞壑谿家人慎勿多

勃讎乃致自潰黃金隄此酒可當盟牲刳生死  
交願諸軍締切之和之惟汝蠅言畢亦醕紅玻  
瓈萬夫一諾天爲低歡嬉拜謝日已西明日之  
日吹大蠡人人刀劍膏蘸鷄厲矛淬戟剜雙鉞  
盾鼻上索矢飲錦洗鎗雷動鳥避棲禱神紅燭  
光騰奎資飫分覓乾糧齎更鎖鐵幕脂綠鞬旌  
幢搖搖皆皂綿黃昏嗽過揚狂堅傳聞此戰惟  
鳴輦環城四面分航梯苟有一人顏慘悽返走  
半步生難後軍法所在霜威淒誓不令賊誅重  
稽將軍方絡入蔡驪崇壇危坐藤蘿萋露布已



疊千赫幌入告庶慰 天心憐一時驚喜徧旄  
倪譬積陰雨看紅霓道旁萬頸延螭螭耨鋤擬  
捉獸脫罽香花迎祝將軍禔夜不敢寐朝陽躋  
捷音杳甚秋瘖蛭日中纔聽怒馬嘶但見泛泛  
如鳬驚兵不血刃身不泥全軍而退歸來兮

初五日紀事

前日之戰未見賊將軍欲赦赦不得或語將軍  
難盡誅姑使再戰當何如昨日黃昏忽傳令謂  
不汝誅貸汝命今夜攻下東北城城不可下無  
從生三軍拜謝呼刀去又到前回酣睡處空中

烏烏狂風來沈沈雲陰轟轟雷將謂士曰雨且  
至士謂將曰此可避回鞭十里夜復晴急見將  
軍天未明將軍已知夜色晦此非汝罪汝其退  
我聞在楚因天寒龜手而戰難乎難近來烈日  
惡作夏故兵之出必以夜此後又非進兵時月  
明如晝賊易知乃於片刻星雲變可以一戰亦  
不戰吁嗟乎將軍作計必萬全非不滅賊皆由  
天安得青天不寒亦不暑日月不出不風雨

有賊回據安慶且入楚矣

賊自上游至長江路二千連城棄如屣原不解

言二  
乘船南國萬檣集東風一炬便何期多護惜卻  
助勢滔天

專閫非無意留他去路長可知重入楚未必是  
還鄉北騎通河洛西塵接蜀羌掌紋吾暗數奈  
室替徬徨

初六日將辭諸營而去

旁觀不覺舉棋頻鳥聲多漸惹瞋吾舌能令  
金馬泣軍心只似木雞馴族羸有劍難從死伍  
員無簫欲救貧徒賺北堂占鵲報猜兒已作後  
車人

馬總戎

龍

聞余將去欲以一帳處之並有

饋金意書此見志

徒以餘生貸難忘越俎愚本無貂可敝休問鮒  
將枯此去從傭磨隨人目濫竽但煩他日念吾  
說或非誣

初七日去大營擬寄城中諸友

十萬冤禽仗此行誰知乞命事難成包胥已盡  
滂沱淚晉鄙惟聞嘯喑聲自古天心慳悔禍雖  
余人面錯偷生一身輕與全家別何日殘魂更  
入城

言一  
於蜀兵處見一五銖錢較常見者輪郭大  
三之一銅質澤甚綠沈入骨決非贗作  
鄙見爲諸葛治蜀時物蜀人相傳是漢  
武帝賜諸將者語無可考漫成一絕句  
鄧氏銅山已劫灰此錢傳自柏梁臺當時誰買  
臨邛酒親見文君數過來

南師九首

錄七

長揖軍門暗斷腸賊威都仗我兵揚四年不信  
七經略萬里從無一戰場人拜馬頭如歲望公  
輸鼠膽欲宵藏大名枉說來西蜀那有閒心對

太陽

餘子儻同煮後蠶  
大家巾幗早無慙  
安知眞病生非福  
盡奪高官去也甘  
厭客論兵妨熟睡  
願天殛賊作常談  
頭顱未肯輕兒戲  
夜夜燒香徧佛龕

登壇拜後總書生  
下策慵談紙上兵  
報主但遵時晦養  
逃人便占國殤名  
盼他帆影滔天去  
聽我鐃歌市地聲  
昨日衝冠逢一怒  
是誰癡絕請攻城

畫灰商略捷書窮  
狂語欺

天任捕風道瑾無

言充虜獲軍儲有計報虧空家肥自感 君恩  
厚師老仍誇士氣雄幾輩得官蒙 上賞臣身  
猶在夢魂中

近來驕子似仇讐上將威聲盡罷休磨盾傳先  
書貨殖枕戈鄉竟號溫柔豬奴戲具錢連屋鷺  
粟花膏火競篝循例繞城頻挑戰睡醒猶喜戴  
吾頭

一片刀光慘黑埃千邨萬落半成灰軍威卻有  
吾民畏賊過何曾似此來繡野經時行路斷冤  
禽隨處哭聲哀只應報道紅巾至魑魅猶能暫

嚇回

偷生自恃 國恩突日日 官家盼好音飽食

又經過四月訓功莫更吝千金問誰單騎能嘗  
寇賴此長城始到今自古平淮屬降將斯人休

使再寒心

謂張都司國標

酒人船歌 有序

余友熊君自龍溪僱一舟邀余同至王  
墅既登舟則舟人蔣姓其舟固每歲泊  
城內運瀆河去余家僅數十步余與陳  
子月舟何子澹成小作妝點常遊於青



溪數里一時士女皆呼爲酒人船者也  
當賊犯江時幸脫出在湖熟日以供行  
客來往其舟中之物則皆灰燼矣問答  
未已向余泣下余亦不覺惘然復買酒  
與熊君盡醉作此歌詒之

龍溪橋上酒人醒龍溪橋下酒船冷酒船舊泊  
城南河曾費酒錢如水多每迎花片飛紅雨便  
劃萍根送碧波櫂聲驚動提壺客愛問青溪潮  
幾尺張鐙不學夜銷金邀笛難忘春泛宅此船  
不與衆船同青漆爲闌布作篷竹几籐牀宜釣

具香篝茶竈稱詩筓朝來載酒青溪去只覓有  
風無日處渡頭垂柳樹間藏巷口紫薇花下住  
斜陽萬丈徹中流更借層陰傍畫樓一路卷簾  
催理曲幾家燒燭照梳頭渠儂纔起我儂醉窗  
裏歌成船裏睡吹簫打鼓暮霞邊遙指船如火  
龍至船前天上月華生月爲船多不肯明移船  
我卻尋明月北出青溪即仙窟酒力辭人欲化  
雲月意侵人都入骨五里煙深芳草岸蓼穗成  
圍紅不斷風過輕分宿鷺開露沈濃壓流螢亂  
菰首橋邊盡處停恰隨漁火夜深青何處魚山

吹遠梵多時銀漢看飛星更闌漸受宵涼足船  
回須繞青溪曲青溪船自不還家千朵萬朵珊  
瑚花錦城步步無歸路一艖柔聲一艖遮四邊  
蘭麝熏人走無計別離仍買酒一杯遙賞落鴻  
驚一杯替罰濃螺醜罰太分明賞更勤銀箏無  
數不知聞但論吞海能千斛豈惜如泥又十分  
沙棠林列全無色歇舞停歌看飲劇酒名狂到  
玉釵知笑聲催轉金輪白從今呼作酒人船弄  
船人亦酒壚仙問酒從來曠俗客浣花早與約  
明年明年約已今年到今年春被潢池盜青溪

羅綺半煙塵何論青溪船上人船是鯨吞遺下  
物人是鵲唳死後身人將船共依村社來往炎  
官張繖下田奴買作趁墟牛驛兵賃當傳書馬  
有時風雨宿蒲葭晚飯篝鐙自歎嗟誰信小姑  
祠畔路曾伴天孫門外槎此人此語太辛酸況  
我方悲行路難何意相逢偏在此聲聲痛哭鷗  
鳬裏坐上疑留當日香眼前還是東來水橋頭  
酒價問何如少得停船一醉無

至王墅喜晤蔡紫函

琳

我行至善橋即知君已歸題壁數行書明明君

珠璣五處蹤迹君先後常相違我遂至鍾山妄  
欲憑軍威句當金陵事一鞭借指揮抵掌千萬  
語語語乖兵機善刀昨乃退身在還苦饑今朝  
喜逢君君體亦不肥君行新年初二月至帝  
畿帝畿稅駕時南事日已非翻然辭春官手  
指身上衣驅車急還南豈不夜策駢詎知賊在  
城反是官軍圍只今三月餘不見慈親闈君母  
幸安善君婦能先幾故居雖已遷姑婦仍相依  
我況母多病桑榆尤珍暉身本留城中往往賊  
察譏久睽晨與昏難守雲邊扉老母因命行萬

一解繫戰所志竟不成無分司鼓旗君當謂我  
何豈爲知音希龍溪澄之子亦復同歔歔寄書  
欲迎母安得空中飛歧途吾三人未暇談式微  
舉頭天自寬但見陰霏霏

十六日至秣陵關遇赴東壩兵有感

初七日未午我發鍾山下蜀兵千餘人向北馳  
怒馬傳聞東壩急兵力守恐寡來乞將軍援故  
以一隊假我遂從此辭僕僕走四野三宿湖熟  
橋兩宿龍溪社四宿方山來塵汗搔滿把僧舍  
偶乘涼有聲叱震瓦微睨似相識長身面甚赭

稍前勸勿瞋幸不老拳惹婉詞問何之乃赴東  
壩者九日行至此將五十里也

得祁兒死信一百三十八韻

當我行計成汝病三日矣汝母送我行詰汝病  
何似汝母謂汝愈瘳靜亦遺矢惟聞俞將逃意  
似愁不喜母令前牽衣涕泣難熟視其時事太  
急欲夜闖賊壘不復與汝見脫網三十里明日  
書報家尚問汝知否戒汝病甫差勿食桃杏李  
汝母寄我言汝第貪粥醢五月二十六紅日西  
滅軌我方寓樓眠如夢背驚泚明明汝投懷電

掣光倏弭默以心注心頃必汝魂駛兼旬憶汝  
勞望信斷鴻鯉六月既望夕我舟秣陵艤舊僕  
城中來特奉汝母使初道汝尚病音哽雜商徵  
怒使畢其說不覺清淚瀾始知一月前汝母設  
詞詭念我干軍門恐亂人意耳我行辭家時汝  
實困牀第其後體益沈弱肉消至髀終夜長聲  
嘶鞵絳躁自禿脣焦飲索冰茗盃碎諸齒大抵  
汝驕陽墮地肺熱痞昔惟犀與麝性命得所恃  
賊中買藥難致汝藏府毀前日來尋爺乃果汝  
魂是是時汝迷瞽良久氣復弛明旦雞三號汝



遂蟬蛻委不從生父生竟從死父死

祁兼嗣爲先兄子五

月二十六日爲余生日而二十七日即先兄忌日也祁於余生日天初明時已危甚忽張目謂其乳婢曰今日非爺生日乎婢曰然祁不復語其日入時遂昏去數刻蓋即入余夢時也既漸蘇至次日天初明時始氣絕乃與先兄死同日若果有意爲之則尤可悲矣

汝生今

七年材地雖不美已識數千字可免亥誤豕爾

雅蟲魚名偏旁敢縣揣毛詩四萬言琅琅略上

觜諸家蒙求書熟記古名氏索解稍易處麤亦

達大旨性尤喜塗鴉禿翰濁墨滓虛室暫無人

破壁走蛇豸袖中鏝粉錢都售毛竹紙我嘗惡

汝貪教汝學種柿自汝伯父在

祁之嗣先兄在先兄棄世之後

母命姑仍舊稱蓋欲待余再有子也則祁之稱伯父久矣故不改細意校文史

殷勤鑿楹藏顧汝立階祀往往笑語汝爲汝儲  
耒耜他日遺汝田在汝好耘耔於汝無多求但  
願作通士汝意殊欣欣自命語甚侈期盡手口  
之然後從宦仕居然中結習油素好積聚凡我  
所經營草橐尺有咫下至焚棄餘黠黠半瘡痍  
皆汝縹囊物排次納之匱有如希世珍尊閣私  
在已他人苟誤觸汝必瞋且訾昨者賊之至倉  
皇盡室徙盆甌各負戴廚榻互角倚汝猶抱束  
筍當戶喘而俟繼聞屋簷雞書棄若敝屣一賊

憎其多朝趁積薪燬汝獨大詛罵恨不刃狂兇  
與書殆夙緣厲父差可擬滿意汝長成雕蟲世  
其技汝面方如圭汝目澄若水汝髮纔總角早  
自矜帶履準爺作裝束翻不慕紈綺每言是男  
兒詎與嬌女比戚黨羣童中庶幾鶴雛峙汝食  
雖韭藿數必爭兩簋食徹誇留餘分餉諸媼婢  
小妹奪而去亦不難色鄙向夕我飲酒汝志在  
染指姑未乞殘瀝敬立執壺醺須臾竊舉顰眉  
宇潑脂紫偷閒偶戲劇囂噉厭街市最好爲館  
師端坐據高几不知譙訶誰聲責人跪有客

來叩門汝即先曳趾肅拜通寒暄遠勝傖輩俚  
或再試之無深談掌竟抵常博高軒譁謝我喬  
遜梓汝性微戇劣汝母屢笞箠我惟挫汝鋒命  
杖輒中止汝卻畏爺甚頗解折筭恥縱極剔剔  
人我呼則唯唯凡汝平日事了了不勝紀敢曰  
癖譽兒猥效王福時原非阿龍超祁小名阿龍大要  
老牛謁何圖玉之樹香色結空蕊豈免猿唬枯  
茹痛徹筋髓更念汝大母痛尚當倍蓰頻年大  
母病長卧不能起百無一歡腸獨愛汝步跬知  
汝習禮貌不惜錦帘被稱汝么身裁改製服禊

提謂汝多老成決是好蘭芷但非蓬近麻猶恐  
橘化枳聞汝鄰塾歸當飯必停俟召汝叩所學  
詞句覓瑕疵日課責既畢賜汝最肥肺慮汝睡  
之蚤燒燭還繼晷授汝唐賢詩記韻棗栗以汝  
讀請大篇顏霽笑口哆夫豈督汝嚴欲汝璞恆  
砥且藉遣老懷課孫樂故爾我之爲逃人汝代  
職脩澣有汝在眼前門閭可無倚一旦天奪汝  
招魂室伊邇能勿肝脾摧空拳枕衾捶哭久喉  
舌啞涕唾滿槃匱至撫汝病者汝母娣若姒遙  
知汝病篤食已減糠粃頃來火應斷塵冷土竈

錡向人作喑鳴面垢髮弗纒癡絕焚紙錢賣盡  
舊簪珥汝今掉頭去野路陰風裏幸有汝伯父  
挈汝竄荆杞相依九幽居鬼屋何處址晨夕儻  
嬉遊想訪汝褱姊饑寒當汝調汝更幼於彼可  
知憶生人黃壤陟岵岵可知生人悲黑海失涯  
涖況我近中歲汝外尚無子六世二百載金氏  
孰尸祀余家自宛平遷江甯已二百年及顧影  
余爲第六世今惟余一人而已此孤注神悸魄潛靡只恐羸者身我病復此始  
聞汝奄逝後桐棺賊禁庀貯汝故衣櫬四周實  
絮桌昏夜急埋汝偷掘菜畦坻淺土封汝穴仍

僞種蒿芑暫免狐犬搜雨甚斯立圯我瞻金陵  
城鐵鑄萬千雉將軍收城事未易時日跂他年  
尋汝墳汝定飽螻螳嗟哉我今生無見汝骨理  
哭汝不成聲濡筆盡於此字皆汝所識聊當祭  
汝誄知汝聞不聞寫吾哀而已

烏江道中

車塵三百里處處稻苗齊樂歲無豺虎仙源此  
犬雞客愁如水冷鄉夢與雲低倚樹消殘醉病  
蟬時一嘶

飲石學山

履祥

野秀軒大醉用朱東扈丈

九日學山齋中宴菊原韻奉呈

梅已銜霜菊猶有狂客憑詩來獵酒主人愛酒  
得酒偶謂我今宵可三斗韓公吳公二豪叟且  
勿頽唐宜抖擻以花下酒兩不負以酒寵花花  
解否我初亦學處女守胸有怒霓忽窺牖自春  
及今幾辛酉江寧初陷時雜占有金雞之讖說者謂侯辛酉日可滅賊今日則冬  
辛酉也蓋已五辛酉矣我尚哀鴻過江走除卻酒鄉日一  
卣安能耐此亂離久多君種秫命耕耦釀此醅  
醪如趙厚冷腸一酌熱生陡呼酒來前立鐙右  
與爾何讐掣吾肘昔年貰爾春在手今日見爾



言二  
只低首酒不能言意已剖膏騰語汝黑甜後飲  
汝酒者是良友

議團十首

三  
四鄉環郡城地近五百里郡城處其中百之二  
三耳以外皆膏腴有古數縣址五里或一村十  
里或一市村市繁居人十萬戶何止況皆聚族  
處若祖父孫子承平二百年十世盛生齒大半  
富有田名久埒陶倚連房各干霄峻與雉堞比  
賊今踞城守勢已建瓴矣賴有官兵圍賊尚未  
至此諸君當此時豈可巢幕喜

官兵日以老戰勝未可必賊糧餘無多早是縣  
磬室遙瞻陌與阡青苗密於櫛晴雨無愆期滿  
卜有年吉竊恐賊狡獪陰俟農務畢刈稻從琅  
邪一旦潰隄出諸君孰當之此其可慮一

賊縱無此意忍餓不一至頗聞諸道軍餘丁善  
生事當路掠貨財夜與農屋寄農材皆至愚愚  
則必嗜利豈無莠者種潛挾跼蹐志鬼魅來無  
蹤巢穴據便地諸君孰討之此其可慮二

村民縱善類歲豐無過貪城中逃人多幾許露  
宿男近者天暑甚瓜果各遠擔餬口錐刀微破

絳何能慚眼前秋風生體赤僵如蠶負販物漸  
稀寒餓未必甘但使紛乞食蠶聚已不堪且勿  
設他想更作驚人談諸君孰驅之此其可慮三  
我爲諸君謀不如急團衆團衆何人即此燼  
餘閔凡能爲患者材武必自貢選而衣食之緩  
其有生痛然後教之戰刀稍責命中請以三月  
期決不兒戲弄感恩斯效死敢復身命重若得  
精卒萬以百健兒統差非官軍流日日在醉夢  
此四可慮者可慮使可用  
用之何事始始斬亂絲亂將軍有明令軍法列

星粲罪或毫毛輕指名頭立斷矧爲白晝劫胡  
容若輩悍今之團鄉兵本以衛閭閻藉解行人  
圍詎謂耕越畔法宜參保甲戶口籍重按雖極  
荒僻區行擷必夜扞示以聲威聯有警鼓赴難  
家儻藏老姦風聞定先竄此五可慮者可慮使  
可散

既散墟落塵吾兵亦散處四圍當賊衝以備賊  
大舉何山賊經過何水賊渡所何徑賊步捷何  
營賊氣阻米聚毋罅漏棋布各防禦步步仍聲  
聞疆界無爾汝臂指相趨援百隊同一旅此六

言二  
可慮者可慮使可拒

可拒僅可守可戰即可攻可守則無患可攻斯  
有功賊意欺官軍不敢來城中幾輩賊大方分  
寇西而東見衆守城者罷少雜叟童不過三賊  
王嵎負虛聲雄及今奪城入譬乘船順風時乎  
弗可再未聞兵遲工又況所團衆來自無家窮  
孰不念婦稚痛哭常椎胸刺刃仇讐心睡亦髮  
上衝與言奪城事眞若振瞶聾一尚可當百所  
貴試及鋒

我昨挾此說欲佐將軍戎將軍領其語且食蛤

蝻蟲志在賊自去還與粵楚同諸君儻此行慎  
勿官軍從計惟語將軍聊乞遙傳烽捷苟萬分  
一將軍專侯封將軍或見許不致成算空他日  
諸君勞 帝豈無訓庸吾黨二三子心事燒焦  
桐不願列姓名但願觀始終

所費圍兵貲卻非鎰與銖諸君勇解囊何惜財  
區區上答 列聖恩下惜冤禽呼遠銘 國鼎  
鐘近完社枌榆留意此短章瀆聽諸君無

是役也蔡君紫函實啓之余首附之蔡君爲  
文以示四鄉諸君子余就所議語退而以韻

牘排比之不敢爲才語向人也議凡十日蔡君適病城中同志之士不期而集方山者蓋數百人而勇於任勞怨則余與何君澹成孫君澄之不敢謂後焉至於難民億萬輩願與於奪城之役者已相望於百里數十里之外矣時四鄉諸君子以次至意亦許可諾義助者漸有成數有前太守某方說許撫部鳩鄉人金以復城後入賑遺男女爲名撫部聽其計鄉人前已繆許之及聞諸君子之應此舉有成數也則恐不利於其所爲乃以危論聳

撫部撫部竟檄上元江甯二邑令收與此議者未嘗義興周玘之誠幾賈東陽許都之旤於是議中寢矣竊謂當時此議若行狼貙負嵎蟲沙集矢其於收城之功蓋亦未知得當與否若四鄉之防則三年來必有如一日者賊安能尺吞寸削以至有今年五月之慘邪憶癸丑之十有一月所下上諭有聞江南士民傳書誓衆助戰攻城云云似此議聞諸京師得徹聖聽而已無救於一紙之爰書卒之苻登食人陰獄無霽段瀟送女村井



成灰城未復而鄉亦糜焉其怨不得不有所  
叢也

方山夜坐

山僧嬾留客欹榻委泥潦病牆飽雨痕地角生  
綠草我倦命枕簟酸汗夕未澡頗期蝶夢甘塵  
味襲頭腦蒲扇難停揮熱甚大煩惱起來當戶  
坐立地上蓬島是時孤月明浮雲散零縞松杉  
張直蓋團影無荇藻露脚侵衣襟清趣耿在抱  
四邊蟲鳴多久聽壯心槁此聲將秋來可知人  
易老一劍磨未成鬚眉恐已皓半空風忽狂如

吼走南道幾欲挾山去力直逼青昊豈其魑蜮  
雄志竊星斗寶嚴陣此夜行萬怪振旗葆抑是  
虎之孽阮谷死灰燥思鑿銀潢流野嘯召羣獠  
使我毛髮竦齒噤魂失保如何太虛府戾氣許  
橫掃九閻怒有權聲罪想致討雷部多遷延雌  
伏似衰媪憑誰奏便宜痛哭向大造有客鼯而  
呼妙語笑絕倒謂蚤盍噉蟲蟲或撲殺蚤此孫君澄  
之語也知君苦微蟲眠亦不復好荒村雞方曉休  
辭起舞早

奇獄

言二  
奇獄驚神鬼含沙幾費愁欲憑城社力一網盡  
清流不復有人理將無爲賊謀黃金昏汝智吾  
輩又何讐

軍前新樂府四首

黃金貴

黃金貴貴何似一兩舊值銀一斤如今一斤有  
半矣借問軍興時黃金又何用路人笑且瞋軍  
中買者衆大帥積錢塞破屋老兵積錢壓折軸  
縣官錢尚如泥沙各買黃金私寄家黃金著翅  
飛天涯自從二月官軍來督戰未暇先理財所

縫黃金囊可築黃金臺軍中黃金多市上黃金  
少朝市黃金貴暮市黃金了吾儕覓得金鎰銖  
尙博全家十日飽書生聞之笑口瘡昨來悔不  
談黃金一言或動將軍心將軍努力入城去賊  
是黃金如土處

### 無錫車

無錫車聲隆隆百犂肩束千鮓封醕酎十斛薶  
十籠白布萬端衣可縫圓蒲五萬能生風不腆  
土物軍前供軍前供孰所致下邑士民犒軍至  
瓦全自拜諸將賜當暑聊存牛酒意叩門先謁

中丞吏一日二日車初來三日四日車未回五日六日車夫催車上物無人收車夫幾夜露宿愁物下車遠道留車夫明日餓死休車夫譁吏有語中丞誰位開府汝何人斯通縞紵必有黃金一囊少亦青銅萬貫許汝宜急補物阿堵汝聲再苦則殺汝車夫哭相告我是村民蠻城中命我來一刺一禮單刻期速我還雇值尙未完士民非屬官況責賄賂難吏瞋方罵奴膽大中丞無言策馬過車夫含淚守車坐市僧來探無錫貨

## 接難民

接難民善橋東接難民善橋西善橋東西路易  
迷難民出城必到此賊或追至身爛糜文者官  
武者將跪啓將軍語甚壯願分一軍善橋上遙  
爲難民援能使賊膽喪將軍諾諸軍樂善橋東  
喧鼓角善橋西旗幟卓老鴉噪曉日出纔軍士  
提刀紛走開或隱山之阿或伺水之涯束縛難  
民橫索財殘魂驚落面死灰豈無碎金與珠玉  
按身逼脫鞵袴鞵亦有鈍物稍倔强即謂賊謀  
城中來殺之冤骨無人埋難民過盡軍士集諸

君帳下蟻環立若官若將十四三軍士瓜分十六七所接難民凡幾人黃昏幾處沙頭泣有時真有賊追至諸君按甲似無事

半邊眉

半邊眉汝何來太守門下請錢回太守門何處所鍾山之旁近大府大府初聞難民苦公家徧括閒田租旁郡金檄上戶輸一心要貸難民命聘賢太守專其政太守計曰費恐濫百二十錢一人贍太守計曰難民多一人數請當奈何我聞古有察眉律呼僕持刀對人立一刀留下半

邊眉再來除是眉長時防蠹術果奇作蠹術斯  
巧豈但無眉人不來有眉人亦來都少惟有一  
二市井姦賂太守僕二十錢奏刀不猛眉猶全  
半邊眉可三刀焉否則病夫真餓殺癡心尙戀  
一朝活拌與半邊眉盡割吁嗟乎有錢不請非  
人情眉最無用人所輕眉根不拔毛能生徒令  
人醜紛惡聲利之所在人終爭人但有眉來有  
名太守此日長街行見有眉者皆愁城太守何  
不計之毒千錢刳人耳與目萬錢截人手與足  
終古無人請錢至太守豈非大快事



秋蟬吟館詩鈔卷二終